

չինութեան տաճարին Ս. Յարութեան, զի տացեն Հայք
 դրածինս իւրեանց. պատասխանի ետուն և ասեն՝ մեր ոչ
 դիտեմք, այլ Պատրիարքն և ազգն մեր. Դատաւորք ա-
 սեն՝ ուրեմն ստուգեցէք ՚ի նոցանէ և գրով ծանուցէք մեզ,
 զի տացեն Հայք: Ասացին Յոյնք, Հայք միայն ուխտին
 բաժանորդ են և ոչ տիրելոյն: Այսոքիկ բանք ծանր թը-
 ւեցան Ատենակալաց, նմին իրի կշտամբեցին զնոսա և ա-
 սեն՝ ապա դուք զի՞նչ իցէք, ո՛չ ապաքէն ընդ նոսին հա-
 ւասար ուխտաւորք, զի երկիրն Արքային է, և ղերկսին
 ազգսդ հաւասար ճանաչէ նա, չունիք տեղի խրոխտալոյ
 ՚ի վերայ միմեանց՝ Յոյնք անդէն լսեցին, չունելով զայլ
 սրտասխանի: Հայք ասեն՝ արդարեւ սոյն այս բարեկամք
 մեր շինեցին զՍ. Յարութիւն և յարդարեցին զտեղիս իւ-
 րեանց փառաւոր և վայելուչ, իսկ զտեղիս Հայոց յամե-
 նայնի պակաս և խանգարեալ, և ըստ ամենայնի հակառակ
 առաջին ձեւոյն, առ այս զի՞նչ հրաման առնէք. Դատա-
 ւորք ասեն՝ պակաս տեղիքն Հայոց լրացին, և հակառակ
 շինուածքն քակեսցին և կարգեսցի Միւլէլլա քննել ըզ-
 շինութիւնն և դարձուցանել զայն ՚ի ձեւն առաջին: Եւ
 ՚ի վախճանի ժողովոյն՝ ասաց Տեղապահն, տեսէք զտուճար
 ծախուց շինութեան և ՚ի միջի ձերում իրաւախոհ լերուք,
 փակեցաւ Ատենան:

Հայք ուրախութեամբ եւ զուարթ դիմօք մեկնեցան
 անտի, իսկ Յոյնք ընդ հակառակն և խորհրդականք նոցին
 ժողովեալ խորհէին դտանել զելք իրաց, զի զամօթի հա-
 րան ազգովին, և փութացին ՚ի դրունս մեծամեծաց շրջել
 կամելով զմիտս նոցա և զԱրքայի, խոստանալով զմեծ դու-
 մարս ոսկոյ, որչափ և կամեսցին, այլ ոչ ոք համարձա-
 կէր յայնժամ մերձենալ առ նոսա վասն այնպիսի իրաց,
 երկուցեալ ՚ի պատուհասիցն Արքայի: Իբրև տեսին Հայք
 թէ ոչ զիջանին Յոյնք խօսիլ ինչ վասն ծախուց և եդեալ
 են ՚ի մտի չընդունել զայն, կոչեցին ղերկուս ոմանս ՚ի
 գլխաւորաց նոցին, և բանս արկեալ խօսեցան քաղցրու-
 թեամբ հոգալ և տնօրինել զայն ՚ի միջի իւրեանց ըստ
 հրամանի Արքային. և նոքա ծանուցին զայն խորհրդա-
 րանի իւրեանց. սակայն և ոչ սրտասխանի տալոյ արժանի
 վարկան: Էանց ամսօրեայ ժամանակ, և ՚ի նախարարաց